

## Siunnersummut nassuaatit

### **Nassuaatit nalinginnaasut**

#### **1. Aallaqqasiusut**

Inatsisissatut siunnersuut marlunnik siunertaqarpoq:

- 1) sanaartukkanik nalinginnaasumik aserfallatsaaliuineq ilutigalugu sanaartukkat nukimmik atuinerisa annikillisinneqarnissaat qulakkiissallugu, kiisalu
- 2) pisortat ingerlatsinerini allaffissornermi pilersaarusiornermilu atugassamik sanaartukkanik, inissianik, teknikkikkut atortuutinik il.il. nalunaarsuisarnissaq aqutissiuutissallugu.

Illuutillit illuutiminik allangortiterinerini, nutarterinerini imaluunniit sanaartukkat ilaannik atortorissaarutinillu taarsersuinerini nukimmik atuinerup imminut akilersinnaasumik pitsanngorsarneqarnissaanut Naalakkersuisut ilaatigut piumasaqaasiornissaannut, ilaatigullu sanaartukkanik, inissianik teknikkikkullu atortuutinik il.il. nalunaarsuinissami Naalakkersuisut malittarisassanik aalajangersaanissaannut inatsisissatut siunnersuuteqarnikkut piginnaatinneqarput.

#### **2. Siunnersummi immikkoortut pingaarerit**

##### *2.1 Sanaartukkani piusuni allangortiterinerit sanaartorneq pillugu inatsimmut ilanngunneqassapput*

Sanaartorneq pillugu Inatsisartut inatsisaat (Inatsisartut inatsisaat nr. 13, 26. maj 2010-meersoq) – naatsumik oqaatigalugu sanaartornermut inatsit 2010-mi juulip aallaqqataani atuuterpoq. Inatsisip aalajangersagaanut naleqqiullugu sanaartorneq annertuppat, sanaartukkamilu allannguinermit kinguneqarpat sanaartornermut inatsit sanaartukkanut piusunut aallaavittut taamaallaat atuuppoq. Taamaalilluni sanaartukkap qanoq issuserisaata attatiinnarneqarnissaa, qanorlu issuserisimasaanik isikkunitsinneqarnissaa taamaallaat siunertaalluni aserfallatsaaliunerinnarnut sanaartornermut inatsit atuutinngilaq.

Sanaartukkanut nutaanut piumasaqaateqartarnerisulli sanaartukkani piusuni nukimmik atuinerup annikillisinneqarnissaanut assinganik piumasaqaateqanngilaq. Taamaattoq sanaartukkanut piusunut tunngatillugu aamma iliuuseqartoqarnera aalajangiisuuvvoq. Allangortiterineq imaluunniit allannguineq inatsimmi aalajangersakkanut annertunersoq apeqquataatinnagu sanaartukkami aalajangersimasunik aserfallatsaaliuinermi kiisalu allangortiterinermi allannguinermiluunniit sanaartornermut inatsit aamma atorneqarsinnaasunngorlugu, atorneqarsinnaanera siunnersuuteqarnikkut annertusineqarpoq.

Taamaalilluni sanaartukkami nukimmik atuinermut sunniuteqassallutik aserfallatsaaliuinerit, allangortiterinerit allannguinerillu pineqarput. Sanaartugaq aserfallatsaaliorneqartillugu,

sanaartorerillu imminermanni allanngortiterinerunngikkaluarlutik imaluunniit sanaartukkamut allannguinngikkaluarlutik assersuutigalugulu sanaartukkami atortut atortulersuutillu sanaartukkami nukimmik atuinermut sunniuteqartut taarsersorneqarnerini, nukimmik atuinermut tunngatillugu sanaartorneq pillugu inatsisip qaqugukkulluunniit aalajangersagaasa malineqarnissaasa qulakkeerneqarnissaa siunertaavoq.

Sanaartukkani atortut atortorissaarutillu taarserneqarnissaanni atortunik atortorissaarutinillu nukimmik atuinermut pitsangorsaataasunik piginnittut atuinissaannut piumasaqaasiortoqarsinnaanera, inatsisisstatut siunnersuutip qulakkeerpaa. Taamaalilluni sanaartukkamik nalingin-naasumik aserfallatsaaliuineq ilutigalugu sanaartukkani piusuni nukimmik atuineq annikilli-sinneqassaaq.

Ataavartumik aserfallatsaaliuinermut nutarterinerpermullu atatillugu sanaartukkat ilaannik atortorissaarutinillu taarsersuinermi nukimmik atuinermut, inatsisisstatut siunnersuutip akuersissutigineqarnerani nutaanik, sakkortunerusunillu piumasaqaateqalissaq. Sanaartukkani atortunut atortorissaarutinullu ataasiakkaanut piumasaqaasiortoqassaaq, sanaartukkanilu atortunut atortorissaarutinullu taarsersorneqartunut atuutissalluni. Piumasaqaatit aningaasaqarnikkut immi-nut akilersinnaanissaat siunertaavoq.

## *2.2 Sanaartukkanik, inissianik teknikkikkullu atortunik il.il. nalunaarsuineq*

Tunngaviusumik paasissutissaasivimmut atatillugu nuna tamakkerlugu Illuutit Inissiallu nalunaarsuiffiannik (BBR) pilersitsisoqarnissaa pilersaarutigineqarpoq. Sanaartukkanik tamanik, matumani inissiat inuussutissarsiorfiillu kiisalu sanaartukkanut atallutik teknikkikkut atortuutit ilanngullugit, nalunaarsuiffimmut ersarissumik nalunaarsuisoqartassasoq naatsorsuutigineqarpoq.

”Inuaqatigiit digitaliusut - Nuna tamakkerlugu digitaliseeriinermut periusissiaq 2018-2021” Namminersorlutik Oqartussat periusissiarisaanni tunngaviusumik paasissutissaasivik ilaavoq. Tunngaviusumik paasissutissat tamanit atorneqarsinnaasut atorluarneqarnissaat qulakkiissal-lugu siunertaqarluni pisortat ataatsimoorussamik attaveqaateqarnikkut aaqqissuussinera, paasissutissaasivik aqqutigalugu ineriaartortinneqassaaq. Inuaqatigiinnut qitiusumik tunngallutik paasissutissat, soorlu inuit (CPR), suliffeqarfii (CVR) najukkat, nunaminertat, sanaartukkat il.il. pillugit tunngaviusumik paasissutissanik nutartikanik paasissutissartaqarlutik digitalikkut tunngaviusumik paasissutissanik nalunaarsuiffiit, pisortat ingerlatsilluarnissaannik ullut-sinni inuaqatigiinni digitaliusuni sakkussaapput pinngitsoorneqarsinnaanngitsut, soorlutaaq inuaqatigiinni ingerlatanut tamanut, nunamilu inuussutissarsiutitigut aningaasaqarnikkullu ineriaartitsinermi tunngavissiisuuusut.

Illuutit inissiallu ersarissumik normulerosrlugit illuutinik inissianillu tamanik nalunaarsuisar-neq annerusumik, minnerusumilluunniit inatsisitigut tunngaveqarluni ukiorpassuit ingerlaneri-ni ingerlanneqarpoq. Tunngaviusumik paasissutissaasivimmut piumasarineqartut naapertorlu-

git illuutit, inissiallu siunissami nalunaarsorneqartalersinnaaqquullugit, inatsisitigut tunngavis-saq inatsisissatut siunnersuutitigut aqqtissiorniarneqarpoq. Ataatsimut isigalugu tamatumani suleriaatsip atuuttup ingerlateqqinneqarnissaa siunertaralugu, inatsisissatut siunnersuut ilusi-lersorneqarpoq.

Pilersaarusrornermut sanaartornermullu inatsit 1981-imi januaarip aallaqqaataani naalagaaf-fimmit tiguneqarpoq, Kalaallit Nunaannilu illuliortiternermi oqartussaaneq pillugu Nammi-nersornerullutik Oqartussat nalunaarutaatigut nr. 31, 10. december 1985-imeersutigut illuli-or-titernermi oqartussaaneq – Namminersornerullutik Oqartussat sinnerlugit Grønlands tekniske Organisationimit (GTO) 1981-imi januaarip aallaqqaataanit isumagineqartoq – 1986-imi januaarip aallaqqaataani atuutilersumik kommuninut tunniunneqarluni. Ataatsimut tapiissutit isu-maqatiginninniutigineqarnerini tassunga tunngatillugu isumaqatigiissutigineqarpoq, kommu-nit illuliortiternermi oqartussaasut suliaannik isumaginninnerminnut tapertaliullugu kommunit ataasiakkaat ingerlatsivimmi iluini illuutinik nalunaarsuissasut.

1987-imi januaarip aallaqqaataanit Namminersornerullutik Oqartussat GTO tiguaat, tak. Grønlands tekniske Organisationi pillugu Inatsisartut peqqussutaat nr. 8, 19. december 1986-imeersoq (GTO pillugu peqqussut). GTO pillugu peqqussutip § 2-ani nr. 6 naapertorlugu, "Kalaallit Nunaanni illunik nalunaarsuineq" GTO-p isumagisaraa. GTO pillugu peqqussutik-kut Naalakkersuisut – landsdommeri isumaqatigereerlugu – illunik nalunaarsuinermut maleru-agassanik aalajangersaanissaminut piginnaatinneqarput (§ 5-imi imm. 1). Taassuma saniati-gut illunik nalunaarsuineq tamakkiisumik, ilaannakortumilluunniit Naalakkersuisunit kommu-nenut suliassiissutigineqarsinnaasoq GTO pillugu peqqussutitigut aalajangerneqarpoq (§ 5-imi imm. 2). Tamanna tunngavigalugu "Kalaallit Nunaanni illunik inissianillu nalunaarsuisar-neq" (GTO-mit kaajallaasitaq nr. 2.088 12. marts 1987-imeersoq) GTO-p kiffartuuttakkami-nut atulersippaa. Kommunini illuutinik normulersuisarnerni, GTO-p kaajallaasitaani malittari-sassat ulloq manna tikillugu aallaaviupput.

GTO-p/Nuna-Tek-ip 1992-imi januaarip aallaqqaataani immikkoortinnejernerisigut "Kalaal-lit Nunaanni illunik inissianillu nalunaarsuisarneq" suliffeqarfimmuit nammineertitamut Asiaq-mut tunniunneqarpoq. Tamannali aatsaat 1993-imi novembarip aallaqqaataani malitta-riisassiunneqarpoq, tak. Misissueqqaarnerit pillugit Inatsisartut peqqussutaat nr. 18, 28. Okto-ber 1993-imeersoq. Taamaattoq 2009-mi kommuninik aaqqissusseqqinnermut atatillugu Asi-aq nuna tamakkerlugu illunik nalunaarsuisarunnaarpoq.

Najukkat pillugit Inatsisartut inatsisaat nr. 17, 27. novemberimeersup 2021-mi agustip 15-iani atuutsilerninneqarneratigut ilaatigut aalajangerneqarpoq, kommunit illuutit normui aalaja-ngersassagaat (§ 1), kiisalu "illoqarfimmi imaluunniit nunaqarfimmi illuliat ataavartut tamamik illuliap normuanik nalunaarsorneqassasut" (§ 3-mi imm. 1). Illup normua sumiiffippaa-lunni illup adressianut atavoq, taassumali saniatigut siunissami Illuutinut inissianullu nalu-naarsuiffeqalernissaq najukkat pillugit inatsisip § 3-ata ilaatigut siunertaraa (najukkat pillugit

inatsimmut nassuaatini § 3 innersuussutigineqarpoq). Taamaalilluni kommunit illuutinik na-lunaarsuisarnerini inatsisitigut tunngavissamik pilersitsinissamut alloriartoqareerpoq.

Taamaattoq Nuna tamakkerlugu Illuutit Inissiallu nalunaarsuiffiannik pilersitsinermi piginaatitsineq, nammagassat suliassallu agguataarneqarnerat pillugit inatsisiliortoqartariaqarpoq. Sanaartukkanik nalunaarsuisarneq pillugu kaajallaasitaq atuttooq naapertorlugu kommuninit ullumikkut isumagineqarluni sanaartukkanik nalunaarsuisarneq, illulianillu normulersuisarneq ataqtigiissitsinneqarnissaat qulakkeerumallugu, tamanna sanaartornermut inatsimmut ilanganneqassasoq siunnersuutigineqarpoq.

Sanaartukkanik nalunaarsuisarnermut ilisimaneqartumut Illuutit Inissiallu nalunaarsuiffiat taarsiunneqassaaq, taamaakkaluartorli sanaartukkanik nalunaarsuisarnermut annertusaanertut aaqqissunneqassasoq siunnersuutigineqarluni. Taamaalilluni Naalakkersuisut paasissutissanut akisussaatillugit nuna tamakkerlugu nalunaarsuiffinngorlugu nalunaarsuiffik ingerlanneqassaaq. Taamatut ilusiliinikkut ilaatigut kommunit ingerlatsinerinut ataqtigiissitsilluarnissaq, ilaatigullu Namminersorlutik Oqartussani kommuninilu oqartussaasut allaffisornerini pilersaarusiornernilu qitiusumik nalunaarsuiffittut atorneqarsinnaanissaa qulakkeerneqassaaq.

Sanaartukkat, inissiat inuussutissarsiorfillu pillugit paasissutissanik piviusunik/teknikkikut paasissutissanik kiisalu pisortatigoortunik paasissutissanik Illuutit Inissiallu nalunaarsuiffiup paasissutissaqarnissa siunertatuaavoq, taamaalillunilu sanaartukkat naliinik il.il. nalunaarsuiffik paasissutissaqassanani. Sanaartukkamik piginnittooq, piginnittup aqqa, piginnittup nاجaa imaluunniit inuttut normua paasissutissani paasissutissutigineqassanngilaq, soorluttaaq piginnittooq pillugu allatigut paasissutissanik paasissutissaqassanngitsoq.

Kommunit nalunaarsuiffimmik ingerlatsissasut siunnersuutigineqarpoq. Taamaalilluni sanaartukkat, inissiat teknikkikkullu atortuutit il.il. nalunaarsuiffimmut nalunaarsorsimanissaat, nalunaarsorneqarnissaallu kommunit akisussaaffigissavaat, soorluttaaq sanaartukkat, inissiat, teknikkikkullu atortuutit il.il. ataasiakkaat pillugit paasissutissat nutarterneqartarnissaat aki-sussaaffigissagaat.

Nalunaarsuiffiup imarisassaanik, paasissutissanik aallernissamut nalunaarsuiffinnullu allanut ataqtigiissitsinissaq kiisalu sanaartukkanut, inissianut, teknikkikkullu atortuutinut il.il. isersinnaanissaq kiisalu paasissutissanik takunnissinnaanermut atuisinnaanernullu kiisalu kommunit nalunaarsuiffimmik ingerlatsinerinut nakkutiliinissaq pillugu Naalakkersuisut malittarisassiuussinissaannut piginnaatinneqassapput. Inatsit naapertorlugu malittarisassat, kommunik isumaqtiginninniareernikkut aalajangersarneqassapput.

### **3. Pisortanut aningasaqarnikkut allaffissornikkullu kingunerisinnaasai**

Massakkut sanaartukkanik nalunaarsuisarneq Illuutit Inissiallu nalunaarsuiffiata atuutsilersin-neqarneratigut ingerlateqqinnejqassaaq. Sanaartukkanik nalunaarsuisarnerup pilersaarutaasu-

mik annertusarneqarnissaa aningaasaqarnikkut allaffissornikkullu pisortanut imatut kingune-qassanngitsoq nalilerneqarpoq. Illuutit Inissiallu nalunaarsuiffiannut systemissaq najukkanut nunaminertanullu qarasaasiatigut systeminut atorneqartunut ilanngunneqassasoq naatsorsuutigineqarpoq. Taamaalilluni kommunit ataasiakkaat sanaartukkanik nalunaarsueriaasii atorun-naarsinneqarsinnaalissapput. Taassuma kingorna qarasaasiatigut systemi assigiissaarneqarsi-masoq kommunit atorsinnaalissavaat, taamaalillutilu kommunini ingerlatsinermut aserfallat-saaliuinerpullu manna tikillugu sulisorineqartut nukiillu atorneqartut atorunnaarsillugit.

Illuutit Inissiallu nalunaarsuiffimmik pilersitsineq tunngaviusumik paasissutissaasivimmuit ilaavoq. Sanaartukkanut, inissiat, teknikkikkullu atortuutinut il.il., taakkununngalu tunngatillugu paasissutissaasivimmik pilersitsinermi, kingornalu ingerlatsinermi aserfallatsaaliuiner-milu aningaasaqarnikkut allaffissornikkullu kingunerisinnaasai nalilersorneqarnikuunngillat. Sanaartukkat, inissiat, teknikkikkullu atortuutit il.il. pillugit akerlileruminaatsumik paasissu-tissaasivimmik pilersitsineq piffissatigut, taamaalillunilu nukissatigut pisortanut sipaaruteqar-nermik kinguneqassasoq nalilerneqarpoq.

Illuutit Inissiallu nalunaarsuiffimmik pilersitsinermut atatillugu sanaartukkat, inissiat, teknikkikkullu atortuutit il.il. pillugit paasissutissanik ikkussuinissaminnut kommunit suliassaqsapput. Nalunaarsuiffimmik, pisariaqartumillu qarasaasiatigut systeminik pilersitsinissaq pil-lugu inatsisissatut siunnersuut naapertorlugu najoqqtassiassat, naalakkersuisoqarfiup susas-saqartup kommuninik suleqateqarneratigut suliarineqassasut naatsorsuutigineqarpoq. Kom-muninut aningaasaqarnikkut kingunissai, kommuninut ataatsimoortumik tapiissutissat Naa-lakkersuisut kommunillu akornanni isumaqatiginniutigineqarnerinut ilanngunneqassapput.

#### **4. Inuussutissarsiortunut aningaasaqarnikkut allaffissornikkullu kingunerisinnaasai**

Siunnersuut inuussutissarsiortunut aningaasaqarnikkut allaffissornikkullu toqqaannartumik kingunissaqanngilaq.

Sanaartukkat, inissiat, teknikkikkullu atortuutit il.il. tuninerinut, qularnaveeqqusiuunnerinullu atatillugu suliamik suliarinninnermi atugassaasunik aningaaserivinnut, taarsigassarsisisartsar-finnullu paasissutissanik attuumassuteqartunik tunniussinissamut sanaartukkanut, inissiat, teknikkikkullu atortuutinut il.il. tunngaviusumik paasissutissaqarluni nalunaarsuiffimmik pilersitsineq tunngavissiissasoq naatsorsuutigineqarpoq.

#### **5. Avatangiisinut, pinngortitamut inuillu peqqissusaannut kingunerisinnaasat**

Siunnersuut avatangiisinut, pinngortitamut inuillu peqqissusaannut kingunissaqanngilaq.

#### **6. Innuttaasunut kingunerisinnaasat**

Siunnersuut innuttaasunut aningaasaqarnikkut allaffissornikkullu toqqaannartumik kingunissaqanngilaq.

Sanaartukkanut, inissianut, teknikkikkullu atortuutinut il.il. tunngaviusumik paasissutissarta-lerlugu nalunaarsuiffimmik pilersitsineq sanaartukkanik, inissianik, teknikkikkullu atortuutinik il.il. tusinermut qularnaveeqqusiinermullu atatillugu suliamik suliarinninnermut oqilisaas-sissasoq naatsorsuutigineqarpoq.

## 7. Kingunerisinnaasai allat annertuut

Siunnersuut allatigut annertuumik kingunissaqassangatinneqanngilaq.

Siunnersuut Naalagaaffeqatigiinnermut imaluunniit Kalaallit Nunaata tunngaviusumik inatsi-sitigut inissisimaneranut kingunissaqanngilaq.

Sanaartukkanik, inissianik, teknikkikkullu atortuutinik il.il. nalunaarsuinissami malittarisassa-nik aalajangersaanikkut Forsvarsministeriaqarfíup, Justitsministeriaqarfíullu sanaartukkanik, inissianik, teknikkikkullu atortuutinik il.il. atugaannik nalunaarsuinissami, paasissutissanillu ingerlatitseqqinnissami Naalakkersuisut immikkut ittunik malittarisassaliortussaassapput.

Pituffimmi sakkutooqarfimmut siunnersuut atuutsinneqanngilaq. Sanaartorneq pillugu inatsi-sartut inatsisaat Pituffimmi sakkutooqarfimmut atutinngitsoq malillugu atutinngilaq, takuu Sanaartorneq pillugu Inatsisartut inatsisaanni § 31.

## 8. Tusarniaaneq

Piffissami 2023-mi januaarip qulinganit, 2023-mi februaarip 13-iata tungaanut Naalakkersui-sut tusarniaaviatigut siunnersuut tamanut tusarniutigineqarpoq, taassumalu saniatigut tulliuttu-mi tusarniaaffigineqartunut toqqaannartumik nassiunneqarluni::

- Sulisitsisut
- NUSUKA
- SIK
- Nunatta Eqqartuussisuuneqarfia
- CSR Greenland
- Transparency International Greenland
- Nunatsinni Advokatit
- Naalakkersuisut Siulittaasuata Naalakkersuisoqarfia
- Aningasaqarnermut Naligiissitaanermullu Naalakkersuisoqarfik
- Nunanut Allanut, Inuussutissarsiornermut Niuernermullu Naalakkersuisoqarfik
- Aalisarnermut Piniarnermullu Naalakkersuisoqarfik
- Isumaginninnermut, Suliffeqarnermut Nunamullu Namminermut Naalakkersuisoqarfik
- Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik
- Aatsitassanut Inatsisillu Atuutsinneqarnerannut Naalakkersuisoqarfik
- Nunalerinermut, Imminut Pilorsornermut, Nukissiutinut Avatangiisinullu Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Peqqissutsimut Naalakkersuisoqarfik

- Kommuneqarfik Sermersooq
- Kommune Kujalleq
- Qeqqata Kommunia
- Avannaata Kommunia
- Kommune Qeqertalik
- INI A/S
- Iserit A/S
- Illuut A/S
- Nukissiorfiit
- Mittarfeqarfik
- KNI A/S
- Tusass
- Royal Greenland A/S
- Kalaallit Airports A/S

Tusarniummut akissuteqaatini pingaernerit Ilanngussaq 2-mi allanneqarlutillu oqaaseqarfingineqarput.

## **Siunnersummi aalajangersakkanut ataasiakkaanut nassuiaatit**

### *§ 1-imut*

#### Nr. 1-imut

##### § 1-imut.

Sanaartornermut inatsisip § 1-iani nr. 7-imik ilassuteqarnikkut siunnersuutigineqarpoq, illuutinik nalunaarsuisarneq pillugu inatsit sanaartornermut inatsimmut ilanngunneqarnissaanik siunnersummut naapertuuttumik inatsisip siunertaa annertusineqassasoq, tak. siunnersuutip § 1-iani nr. 3. Illuutinik inissianillu ataqatigiissumik nalunaarsuisarneq siunissami sanaartornermut inatsisitigut qulakkeerneqartarnissaanik tamanna kinguneqassaaq.

#### Nr. 2-mut

##### § 2-mut.

Imm. 1-imu nr. 5-imi siunnersuutigineqarpoq, sanaartukkami nukimmik atuinermut sunniuteqartussaalluni sanaartukkamik piusumik aserfallatsaaliusoqartillugu, allanngortiterisoqartillugu allatigullu allannguisoqartillugu sanaartornermut inatsit aamma atorneqassasoq. Sanaartornermut inatsisip aalajangersagaanut naleqqiullugu allanngortiterineq imaluunniit alangnuineq annertugaluarpalluunniit, taamatut pisoqartillugu sanaartornermut inatsit atorneqassaaq.

Taassuma kingunerisaanik sanaartornerit, matumani aserfallatsaaliuinerit, sanaartukkami atortunik atortorissaarutinillu taarsersuinerit ilanngullugit, nukimmik atuinermut sunniuteqarsinnaasut kiisalu sanaartukkami nukimmik atuinermut pitsanngorsaataasinnaasut sanaartornermut inatsisip § 2-ani imm. 1-imu nr. 5-imut ilaatinneqassapput.

Imaappoq, aserfallatsaaliuineq sanaartukkami nukimmik atuinermut sunniuteqartussaillugu aserfallatsaaliuinerinnarnut (taannalu patsisigalugu sanaartukkap isikkoqqaavata attatsiinnarneqarnissaanik taamaallaat siunertaqtunut) sanaartornermut inatsit aamma atorneqassasoq. "Sanaartukkami nukimmik atuineq" innersuussutigineqartillugu, illuliornermut malittarisassani aalajangersakkat allat eqqarsaatigalugit pingaaruteqarluni tunngaviusoq attatiinnarneqassaaq.

Sanaartornerit, matumani aserfallatsaaliuinerit, sanaartukkami atortunik atortorissaarutinillu taarsersuinerit ilanngullugit, nukimmik atuinermut sunniuteqarsinnaasut kiisalu sanaartukkami nukimmik atuinermut pitsanngorsaataasinnaasut sanaartukkami nukimmik atuinermut sunniuteqartussatut isigineqarput, taassumalu kingunerisaanik sanaartornermut inatsisip § 2-ani, imm. 1-imu nr. 5-imut ilaatinneqassallutik. Aserfallatsaaliuineq pineqartillugu sanaartukkamik

tamakkiisumik ilaanilluunniit aserfallatsaaliuineq kiisalu sanaartornermi atortunik ataasiakkainik taarsersuineq pineqarpoq.

Illutini sanaartukkat ilaannut, atortulersuutinullu piumasaqaatit illuliornermut malittarisassatigut piumasaqaatigineqarput, sanaartukkallu ilaasa atortulersuutillu taarsersorneqarnerinut atuulluni. Igalaamik taarsiineq illumumi nukimmik atuinermut allatigut pitsangorsaasoqarnissaanik piumasaqaatitaqanngilaq. Sanaartukkat ilaannut piumasaqaatit aallaavittut aningaasarnikkut imminut akilersinnaaqqullugit, sanaartukkat ilaannut piumasaqaatit illuliornermut malittarisassatigut aalajangersarneqarput. Imaappoq, atortunut nukimmik atuinermut pitsangorsaataasunut qaavatigut aningaasartuutit, nukimmik atuinermi sipaarutigineqartutigut utertinneqassasut.

Annikinnerusumik aserfallatsaaliuinerni, assersuutigalugu qaliap taarsersorneqarnerani, illu oqorsaaserosoqqinnissaanik alajangersagaq aamma piumasaqaatitaqarpoq. Illup qaliaani oqorsaataareersoq, illullu qaliata sannaan aningaasaqarnikkut imminut akilersinnaassusissaanut apeqqutaapput. Assersuutigalugu illup qaliaa oqorsaaseqqissinnaaqqullugu illup qaliaani quassuttuut il.il. peerneqartariaqassappata, aningaasaqarnikkut imminut akilersinnaassutsip nalinerneqarnissaanni taakkua piiarneqarnissaanni aningaasartutissat ilanngullugit naatsorsorneqassapput. Ilaanni oqorsaaseeqqinnissaq aningaasaqarnikkut imminut nammassinnaasassannigilaq, taamaattoqassappallu oqorsaaseeqqinnissamik piumasaqaat atorunnaarsinnejassalluni. Piumasaqaatit qanoq naammassineqarsinnaaneri pillugit illuliornermut malittarisassat ilitser-suutitaqarlutillu assersuutitaqarput.

### Nr. 3-mut

#### § 17 a-mut.

Paasissutissat suut Illuutit Inissiallu nalunaarsuiffianni paasissutissaatigineqassanersut aalajangersakkat aalajangersarpaat, tassalu 1) sanaartukkanut, sanaartukkanilu inissianut tunngasunut kiisalu teknikkikkut atortuutinut il.il. tunngasunut paasissutissat tunngaviusut kiisalu 2) sanaartukkanik, inissianik inuussutissarsiorfennillu kiisalu teknikkikkut atortuutit, uuttuutit il.il. nalunaarsuiffimmi nalunaarsorneqarsimasunut ersarissumik nalunaarsuineq. Paasissutissat pisortani oqartussaasunut, inuinnarnut suliffeqarfennillu takuneqarsinnaatinneqassapput.

Nalaakkersuisut malittarisassiaasigut aalajangersarneqartumik sanaartukkat atortullu tamarmik normumik ataatsimik nalunaarsorneqarnerisigut, sanaartukkanik atortunillu ersarissumik nalunaarsuinissami piumasaqaataasoq naammassineqassaaq. Sanaartukkamut imaluunniit atortumut immikkuullarissumik normulersuineq, massakkut aaqqissuussinermi atorneqartoq assigalugu ingerlatiinnarneqassasoq eqqarsaatigineqarpoq, takuuk kaajallaasitaq atuuttoq.

Sanaartukkat ataavartut, taamaalillunilu pingaartumik sanaartornissamik akuersissuteqarfiusa-riaqarlutik sanaartukkat kiisalu teknikkikkut atortuutit atortullu nalunaarsuiffimmi nalunaar-

sorneqarsimasut kisimik normulersorneqassasut siunertaavoq. Imaappoq, sanaartukkut minnerusut sanaartornissamik akuersissuteqarfiusariaqanngitsut kiisalu quit, garageat sanaartukkallu minnerit assigisaat sanaartukkamut ataavartumik paatsuugassaanngitsumik atasut normuler-sorneqassanngitsut.

Illuutit, inissiat inuussutissarsiorfiillu kiisalu teknikkikkut atortuutit uuttuutillu qaqugukkut sanaartorneqarsimaneri imaluunniit ikkunneqarsimaneri imaluunniit illuutit, inissiat inuussutissarsiorfiilluunniit imaluunniit teknikkikkut atortuutit il.il. qaqugukkut pilersinneqarsimaneri apeqqutaatinagu nalunaarsorneqassapput.

Teknikkikkut atortuutit il.il. pineqartillugit sanaartukkanut inissianullu nalinginnaasumik atanngitsut pineqarput. Teknikkikkut atortuutit ilaatigut tassaasinnaapput antennet, sakkortusaaviit, anorip nukinganik nukissiuutit, nukissiorfiit/kiassaateqarfiiit, imeqarfiiit, tankeqarfiiit il.il. kiisalu teknikkikkut atortuutit sanaartornermut atasut, assersuutigalugu uuliamut tanki.

#### § 17 b-mut.

Kommunip killeqarfiani Illuutinut Inissianullu nalunaarsuiffik communalbestyrelsip ingerlattisagaa imm. 1-imi siunnersuutigineqarpoq. Taassuma saniatigut sanaartukkani, inissiani, teknikkikkullu atortuutini il.il. kukkunerit paasineqarsimasut tunngavigalugit piginnittut nalunaarutaat kommunip nalunaarsuiffimmut nalunaarsussavai.

Taamaalluni kommunit sanaartornermut tunngatillugu sulianik suliarinninnerminnut atatillugu kaajallaasitaq atuuttoq naapertorlugu kommunip ingerlatsiviani sanaartukkanik nalunaarsuiffimmik kommunip isumaginninnissaanut atatillugu aaqqiissutip atuuttup ingerlatseqqinnejarnissaa pineqarpoq. Nunaminertanut sanaartornermullu tunngatillugu kommunit sulianik suliarinninnerminnut kiisalu najukkat pillugit inatsisip malinneqarneranut atatillugu paassisutissat pissarsiarineqartut ilaatigut tunngavigalugit nalunaarsuiffimmik malinnaatitsinissaq kommunit isumagissavaat.

Nalunaarsuinermi paassisutissat atorneqartussat eqqortuunissaasa qulakkeerneqarnissaa imm. 2-mi pineqarpoq. Illuutinik inissianillu kiisalu teknikkikkut atortuutinik il.il. nalunaarsuinermi pisariaqartumik ersarissuutitsinissaq, pitsaassutsikkullu pitsaasuutitsinissaq communalbestyrelsip qulakkiissallugu pisussaaffigigaa erseqqissarneqarpoq. Illuutit Inissiallu nalunaarsuiffanni paassisutissanik nakkutiliissalluni communalbestyrelsip akisussaaffigigaa kiisalu Illuutit Inissiallu nalunaarsuiffianni paassisutissat pissutsinut piviusunut naapertuutinnginnerinik pitsaassaqarnermi qisuarinissaminut communalbestyrelsip pisussaaffeqarnera aamma ersarissarneqarpoq.

Imm. 3-mi piginnittut nalunaarsuiffimmut nalunaarutaannik qanoq nakkutiliisoqarnissaanut Naalakkersuisut malittarisassanik aalajangersaasinnaassasut siunnersuutigineqarpoq. Sanaartukkanik piginnittut sanaartortitaminik allannguutinik nalunaaruteqarnissaminni siunissami

digitalikkut nalunaaruteqartalernissaasa naatsorsuutigineqarnerani, pisariaqartumik nakkutil-liinissaq qulakkeerumallugu tamanna pisariaqartutut tunngavissatut isigineqarpoq. Tamatuma saniatigut piginnittut Illuuit Inissiallu nalunaarsuiffiannut nalunaarutaannik nakkutiginninnis-sami ersarinnerusumik malittarisassiorqarnissaanik siunnersuut, digitalikkuunngitsoq nalunaarutiginninnerit pisariaqartumik nakkutigineqarnissaasa qulakkeerneqarnissaannut aamma atuuppoq.

#### § 17 c-mut.

Sanaartukkanut nalunaarsuiffimmik pilersitsinissamut, ingerlatsinissamut, ineriertortitsinissa-mullu akisussaaffimmik pisortani oqartussamut imaluunniit ingerlatseqatigiiffimmut nammi-nersortumut tunniussisinnaanissaannut Naalakkersuisut piginnaatinneqassasut siunnersuutigi-neqarpoq.

Ingerlatseqatigiiffik namminersortoq, assersuutigalugu aamma kommunit peqatigiillutik ingerlatsiviutigisinnavaat.

#### § 17 d-mut.

Paasissutissat aallaqqaammut nalunaarsorneqartussatut pilersaarutigineqartut assersuutigalugu tassaapput:

- sanaartukkat / atortut normui (sanaartukkat / atortut tamarmik immikkuullarissumik normulersorneqassapput).
- Ukioq sanaartorfiusoq (sanaartukkat nutaannginersut ukioq sanaartorneqarfiat, im-mikkuualuttortai minillugit nalunaarsorneqassapput).
- Piginnettumut tunngasut (sanaartugaq inummit pigineqarnersoq, nalinginnaasumik at-tartortitsinernut inissiaatileqatigiiffiunersoq, aktianik piginneqatigiiffiunersoq il.il. nalunaarsorneqassaaq)
- Sanaartukkap suussusaa (najugaqarfinnut, inuussutissarsiorfinnut, suliffeqarfinnullu immikkoortitsilluni suussutsinut assigiaangitsunut immikkoortiterisoqassaaq).
- Quleriit (inissiap arealia / arealit allat), quleriit qassiunersut kiisalu sanaartukkap arealia.
- Inissiat qassiunersut (sanaartukkami ataatsimi inissiat qassiunersut nalunaarsorneqas-saaq).
- Elevatori (inunnut nioqqutinullu elevatorit nalunaarsorneqassapput, taamaattorli ilaqua-tariinnut ataatsinut illunut assigisaannullu atuutinngilaq).
- Silataanni ikkersuutit (suussutsinut immikkoortiteriikkani ilusaat / atortut nalunaar-sorneqassapput).
- Qaliat (suussutsinut immikkoortiteriikkani ilusaat / atortut nalunaarsorneqassapput).
- Kissartumik pilersuineq (centralvarmit, kingusinnerusukkullu annertusineqarnissaan-nik periarfissaqarlutik allatigut kiassaanerit, assersuutigalugu ataavartumik nukimmik pilersuinerit immikkoortiterneqassapput).

- Kuuffiit (pisortat kuuffiutaannut, tankimut il.il. nalunaarsuinerit immikkoortinneqasapput).
- Iermik pilersuineq (pisortat imermik pilersuinerinut attaviit allanneqassapput).
- Quit/ garageat (immikkuualuttut minillugit nalunaarsorneqassapput).

Imm. 1 naapertorlugu nalunaarsorneqartussat saniatigut paasissutissanik allanik nalunaarsuisoqarnissaanut imm. 2-mi aalajangersagaq periarfissiivoq. Assersuutigalugu inatsit naapertorlugu imaluunniit pisortat suliaannut atatillugu imaluunniit inuiaqatigiinnut allatigut soqutiginaateqartillugit pisortani oqartussat suliassanik sularinninnissaanni, paasissutissat pingaaruteqarnissaat piumasaqaataavoq. Assersuutigalu pisortani oqartussat immikkoortumut pilersaursiornissaanni atugassanik atuisut ataasiakkaat innaallagissamik, kiassarnermik, uuliamillu atusimanaerat malillugu nukimmik atuineq pillugu paasissutissaasinnaapput.

Nalunaarsuiffinni allani paasissutissat, Illuutit Inissiallu nalunaarsuiffianni paasissutissanut ataqtigiissinneqarsinnaanissaannut imm. 3-mi aalajangersagaq periarfissiivoq. Sanaartukkat, inissiat, teknikkikkullu atortuutit il.il. pillugit paasissutissat nalunaarsorneqartussat pissarsiareqarnissaat, paasissutissanik ataqtigiissitsineq siunertaqassaaq. Assersuutigalugu najukkat pillugit allattorsimaffimmi najugaq illuutinut tamanut atasoq pillugu paasissutissanik katersinerusinnaavoq.

Nalunaarsuiffimmik ingerlatsinermi paasissutissat inummut tunngasut, Kalaallit Nunaanni a-tuutsinneqarluni paasissutissat inummut tunngasunut inatsisip sinaakkutai avaqqunnagit isumagineqassasut naatsorsuutigineqarpoq. Imm. 3-mi aalajangersagassatut siunnersuutigineqartoq inummut tunnganik paasissutissanik ilaatigut ataqtigiissitsinissamik kinguneqartussaagluartoq, assersuutigalugu najukkat pillugit nalunaarsuiffimmut ataqtigiissinneqarnissaanni inummut tunngasunik paasissutissanik nakkutilliinissamik siunertaqanngilaq.

#### § 17 e-mut.

Nalunaarsuiffimmik pilersitsinermi paasissutissat tunngaviusut, kommunit massakkut nalunaarsuineri (“sanaartukkanik nalunaarsuisarneq”) tunngavigalugit pissarsiarineqarsinnaassasut naatsorsuutigineqarpoq. Tamatumma saniatigut kommunit inissiaatileqatigiiffiinit, Illuutinut aktianik piginneqatigiiffimmit Illumummit, A/S Inissiaatileqatigiiffik INI-miillu paasissutissanik piniartoqassaaq.

Taamaakkaluartoq nalunaarsuiffiup pilersinneqarnissaani paasissutissat pisariaqartut, assersuutigalugu apeqqutinik akisassanik piginnittunut nassiussinikkut aallaavittut pissarsiarineqassasut naatsorsuutigineqassaaq. Taamaattumik sanaartukkanik, inissianik, teknikkikkullu atortuutinik il.il. piginnittut Illuutinik Inissianillu nalunaarsuiffimmut paasissutissanik eqqortunik pissarsinissaannut, paasissutissiinissaannullu peqquneqartariaqarput.

Sanaartornermut, allannguinermut, ingutserinermut, sanaartukkanik immikkoortitsinermut ataqatigiissitsinernullu, inissianut, teknikkikkullu atortuutinut il.il. atatillugu paasissutissanik aalajangersimasunik piginnittut kommuninut paasissutissiinissaannut, assersuutigalugu Naalakkersuisut malittarisassanik aalajangersaasinnaapput. Nalunaarsorneqarsimasut misisorneqarnissaannik, kukkuneqartillugulu nalunaarutiginninnissaannik piginnittut aamma pisussaaf-filerneqarsinnaapput.

Tamatuma saniatigut assersuutigalugu immersugassanik aalajangersimasunik atuinissamut i-maluunniit qarasaasiatigut nalunaarsuinissamut kiisalu Illuutit Inissiallu nalunaarsuiffiannut paasissutissanik nalunaarutiginninnermi uppermarsaatnik attuumassuteqartunik tunniussinissamut Naalakkersuisut malittarisassanik aalajangersaasinnaapput.

Nunami maani naalagaaffeqatigiinnermi oqartussaasut illuutit atugaat, illersorneqartariaqarsinnaasullu pillugit illuutit, teknikkikkullu atortuutit il.il. pillugit paasissutissat suut nalunaarsorneqarsinnaanissaannik malittarisassanik aalajangersaasinnaanissaq, imm. 2-mi aalajangersagassatut siunnersuuteqarnermi siunertaavoq. Assersuutigalugu tigumminnitarfiusinnaapput, politeeqarfiusinnaapput, illersornissaqarfiullu illuutigisinnaallugit atortulersuutigisinnaallugilu. Pisut amerlanersaanni illuutit taakkua BBR-imi atornerisigut nalunaarsorneqassapput, isumannaallisaanerli pillugu illuut pillugu paasissutissat ersarinnerusut allamut ingerlateqqeqqu-saassanatik.

#### § 17 f-imut.

Pisortani oqartussaasut, matumani Namminersorlutik Oqartussat kommunillu ingerlatsinerat ilanngullugu, kiisalu suliffeqarfuit namminersortutut inuillu Illuutit Inissiallu Nalunaarsuiffianni paasissutissanik takunnissinnaatitaanerinut malittarisassanik Naalakkersuisut aalajangersaanissaannut imm. 1-2-mi aalajangersakkat Naalakkersuisunut piginnaatitsipput.

Namminersorlutik Oqartussat kommunillu ingerlatsinerminni sanaartukkat, inissiat, teknikkikkullu atortuutit il.il. pillugit paasissutissanik nalunaarsorneqarsimasunik atuisartut, nalunaarsuiffik aqqutigalugu paasissutissanik aallertarnissaannik pisussaafflerneqarsinnaanissaat siunertaavoq. Paasissutissat siunertamut arlaannut atorneqarnerat apeqqutaatinnagu, paasissutissat assiguit atorneqarnissaat tassuunakkut qulakkeerneqassaaq. Tamatuma saniatigut sanaartukkat, inissiat, teknikkikkullu atortuutit il.il. pillugit paasissutissanik nalunaarsorneqarsimasunik Namminersorlutik Oqartussat kommunillu atuinerinut tamanut iluarsiissutit iluarsiissutigineqarnissaannut ilutigalugu tapertaassaaq.

Taassuma saniatigut pisortani oqartussaasut allat Illuutit Inissiallu Nalunaarsuiffiannik takunnissinnaanissaannut aalajangersakkanik aalajangersaainissamut aalajangersagaq periarfissivooq. Taamaalilluni ingerlatsinermi sulianut tiguneqarsimanngitsunut, matumani Sullivinnik Nakkutilliisoqarfik, Trafikstyrelsi (silaannakkut angallannermut oqartussaasut), Bygningssty-

relni (Naalagaaffeqatigiinnermi oqartussaasut Kalaallit Nunaanni illuutaannik ingerlatsineq) il.il. Naalagaaffeqatigiinnermi oqartussaasut eqqarsaatigineqarput.

Kiisalu Forsvarsministeriap Justitsministeriallu ingerlatai, pisortanillu illersuinissaq patsisaalluni sanaartukkanik, inissianik, teknikkikkullu atortuutinik il.il. nalunaarsuisoqannginnissaa imaluunniit taakkua pillugit paasissutissat aalajangersimasut nalunaarsorneqannginnissaat eqqarsaatigineqarsinnaapput. Sanaartukkat, inissiat, teknikkikkut atortuutit il.il. pillugit kategoriit suussutsilluunniit Naalakkersuisut minissinnaavaat imaluunniit sanaartukkat, inissiat, teknikkikkullu atortuutit il.il. pillugit kategoriit suussutsilluunniit toqqakkat pillugit paasissutissat nalunaarsorneqarsimasut allanut ingerlateqqinnejqarsinnaasut killilorsorsinnaavaat.

Imm. 2 malillugu paasissutissanik piniajersinnaasut assersuutigalugu tassaapput pilersuinermik ingerlatsiviit, sanaartukkanik illuutinillu ingerlatsisut, illunik tuniniaasartut, eqqartuussissuse-risut, qularnaveeqquqsiilluni taarsigassarsisitsisarfiiit, aningaaseriviit sillimmasiisarfiiillu kiisalu inuit. "il.il."-p ilanngunneqarnerani assersuutigalugu peqatigiiffiit, aningaasaateqarfiiit, suliffe-qarfiiillu imminnut pigisut pineqarput.

#### Nr. 4-mut

##### § 19-imut

Sanaartornermut inatsit unioqqutinnejqarsimanningersoq misissorniarlugu, kommunalbestyrelsi eqqartuussivimmik aalajangiinertaqanngitsumik sanaartukkamut misissuartornissaminik piumasaqarsinnaavoq (imm. 1). Sanaartukkat, inissiat, teknikkikkullu atortuutit il.il. nalunaarsorneqarsimasut, taakkualu pillugit paasissutissat nalunaarsorneqarsimasut nakkutiginissaan-nut kommunalbestyrelsi illunut aamma isersinnaanera, imm. 2-liornikkut ersarissarneqassaa-soq siunnersuutigineqarpoq.

Annertuumik nikingasoqarneranik kommuni pasitsaassaqarnermini, illup iluanut alakkaanisaq pillugu eqqartuussivimmik aalajangiisoqarnissaanik noqqaassuteqarnissaq sioqqullugu, kommunimut akissuteqarnissamut piffissalerlugu pasitsanneqartoq piginnittumut saqqummi-unneqassaaq.

#### Nr. 5-mut

##### § 20-mut

Aalajangersakkamut kukkusumut innersuussineq iluarsiiffigineqarpoq.

#### Nr. 6-mut

##### § 27-mut.

Imm. 2-mi kukkusumik aalajangersakkamut innersuussummik iluarsiineruvoq.

*§ 2-mut*

§ 5 Grønlands tekniske Organisationi pillugu Inatsisartut peqqussutaanni nr. 8, 19. december 1986-imeersumi atorunnaarsinnejqassaaq.

Kalaallit Nunaanni sanaartukkat nalunaarsorneqarnissaannut tunngavissaqqartoq Inatsisartut peqqussutaata § 5-iatigut aalajangersagaavoq, najukkalli pillugit Inatsisartut inatsisaata atuutsilersinneqarneratigut atorunnaarsinnejqarnikuunani. Inatsisissatut siunnersuuteqarnikkut atorunnaarsinnejqarnissaa iluarsiiffigineqarpoq.

*§ 3-mut*

Inatsisartut inatsisaat 2023-mi juulip aallaqqataani atuutilissaaq.

Imm. 2-mi aalajangersarneqarpoq, Kalaallit Nunaanni illunik inissianillu nalunaarsuisarneq pillugu GTO-mit kaajallaasitaq nr. 2.088 12. marts 1987-imeersoq, Sanaartorneq pillugu Inatsit naapertorlugu malittarisassatigut aalajangersarneqarluni allanngortinneqarnissaata imaluunniit atorunnaarsinnejqarnissaata tungaanut atuutiinnassasoq. Tamatuma kingunerisaanik Illuutit Inissiallu nalunaarsuiffiup atuutsilersinneqarneratigut kaajallaasitap atorunnaarsinnejqarnissaata tungaanut, kaajallaasitaq naapertorlugu kommunit sanaartukkanik suli nalunaarsuisarlutillu normulersuisassapput.

**Ilanngussaq 1**

<b>Siunnersummik Inatsisartut inatsisaannut atuuttumut nallersuussineq</b>	
<i>Oqaasertaliussaq atuuttoq</i>	<i>Siunnersuut</i>
	<p style="text-align: center;"><b>§ 1</b></p> <p>Sanaartorneq pillugu Inatsisartut inatsisaanni nr. 13, 26. maj 2010-meersumi tulliuttutut allannguisoqassaaq:</p>
<p><b>§ 1.</b> Inatsimmi matumani siunertarineqarpoq:</p> <p>1) sanaartukkat ikuallattoornissaq, isuman-naallisaaneq peqqinnissarlu eqqarsaatigalugit naammaginartumik toqqisisimanartunngorlugit sananeqarnissaasa ilusilerneqarnissaasa-lu qulakkeerneqarnissaa,</p> <p>2) sanaartukkat nunaminertallu sanaartorfifunngitsut sanaartukkanut atasunut atuinissaq siunnerfigineqartoq eqqarsaatigalugu naammaginartumik pitsaassuseqalernissaasa aammalu illorsorsinnaasumik aserfallatsaaliorneqarnissaasa qulakkeerneqarnissaa,</p> <p>3) sanaartukkat innarluutilinnut atoruminartunngorlugit ilusilersorneqartarnerisa siuarsarneqarnissaa,</p> <p>4) sanaartukkat ilusilersorneqarnermikkut pitsaassusiisa siuarsarneqarnissaat,</p> <p>5) iliuusissat, sanaartukkani isumalluutinik pisariaqanngitsumik atuinissamut akiuissuta-sussat siuarsarneqarnissaat, kiisalu</p> <p>6) sanaartukkani atortut avatangiisinit ajoqua-taanngitsut atorneqartarnerisa siuarsarneqarnissaat.</p>	<p><b>1. § 1 ima oqaasertalerneqassaaq:</b> ” Inatsisartut inatsisaat matuma siunertarineqarpoq:</p> <p>1) sanaartukkat ikuallattoornissaq, isuman-naallisaaneq peqqinnissarlu eqqarsaatigalugit naammaginartumik toqqisisimanartunngorlugit sananeqarnissaasa ilusilerneqarnissaasa-lu qulakkeerneqarnissaa,</p> <p>2) sanaartukkat nunaminertallu sanaartorfifunngitsut sanaartukkanut atasut atuinissaq siunnerfigineqartoq eqqarsaatigalugu naammaginartumik pitsaassuseqalernissaasa aammalu illorsorsinnaasumik aserfallatsaaliorneqarnissaasa qulakkeerneqarnissaa,</p> <p>3) sanaartukkat innarluutilinnut atoruminartunngorlugit ilusilersorneqartarnerisa siuarsarneqarnissaa,</p> <p>4) sanaartukkat ilusilersorneqarnermikkut pitsaassusiisa siuarsarneqarnissaat,</p> <p>5) iliuusissat, sanaartukkani isumalluutinik pisariaqanngitsumik atuinissamut akiuissuta-sussat siuarsarneqarnissaat,</p> <p>6) sanaartukkani atortut avatangiisinit ajoqua-taanngitsut atorneqartarnerisa siuarsarneqarnissaat, kiisalu</p> <p>7) illuutinut inissianullu tunngasut ataqatigiissumik nalunaarsorneqartarnissaasa aqqutissiuunneqarnissaas qulakkiissallugu.”</p>

<p><b>§ 2.</b> Inatsit atorneqassaaq:</p> <ol style="list-style-type: none"> <li>1) sanaartukkanik nutaanik sananermut aama sanaartukkanik alliliinermut,</li> <li>2) sanaartukkami allanngortiterinermut aammalu allatut, inatsimmi aalajangersakkanut imaluunniit inatsit naapertorlugu aalajangersagaliarneqartunut naleqqiullugu annertuumik allannguinermut,</li> <li>3) sanaartukkat atorneqarnerannik, inatsimmi aalajangersakkanut imaluunniit inatsit naapertorlugu aalajangersagaliarneqartunut naleqqiullugu annertuumik allannguinernut, kiisalu</li> <li>4) sanaartukkanik isaterinermut.</li> </ol>	<p><b>2.</b> § 2, imm. 1, ima oqaasertalerneqassaaq: ” Inatsisartut inatsisaat atorneqassaaq:</p> <ol style="list-style-type: none"> <li>1) nutaamik sanaartornermi, sanaartukkamilu alliliinermi,</li> <li>2) inatsimmi aalajangersakkanut imaluunniit inatsit naapertorlugu aalajangersagaliarneqartunut naleqqiullugu sanaartukkami anneruumik allanngortiterinermi allatigullu allannguinermi,</li> <li>3) inatsimmi aalajangersakkanut imaluunniit inatsit naapertorlugu aalajangersagaliarneqartunut naleqqiullugu sanaartukkap atorneqarneranik annertuumik allannguinermi,</li> <li>4) sanaartukkamik ingutserinermi, kiisalu</li> <li>5) sanaartukkami nukimmik atuinermut sunniuteqartussaalluni sanaartukkamik piusumik aserfallatsaaliuinermi, allanngortiterinermi alatigullu allannguinermi.”</li> </ol>
	<p><b>3.</b> Kapitali 3-p kingorna ilanngunneqassaaq:</p> <p style="text-align: center;"><b>”Kapitali 3 a</b> <i>Illuutit Inissiallu nalunaarsuiffiat</i></p>
	<p><b>§ 17 a.</b> Illuutit Inissiallu nalunaarsuiffiat:</p> <ol style="list-style-type: none"> <li>1) sanaartukkanut tunngasunik, sanaartukkani inissianut tunngasunik kiisalu teknikkikkut atortuutinut il.il. tunngasunik tunngaviusunik paasissutissaqqaq,</li> <li>2) illuutit qaqgukkut sanaartorneqarsimanerat apeqquatainnagu illuutinut tamanut, matumani inissiat inuussutissarsiorfiillu kiisalu teknikkikkut atortuutit uuttuutillu il.il. nalunaarsuiffimmi nalunaarsorneqarsimasut ilangullugit, ersarissumik nalunaarsuiffeqassaaq kiisalu</li> <li>3) pisortani oqartussaasunut, inunnut suliffeqarfinnillu paasissutissanik takunnissinnaatisissaaq.</li> </ol>

	<p><b>§ 17 b.</b> Malittarisassat Naalakkersuisunit aalajangersarneqartut malillugit kommunip killeqarfiani Illuutit Inissiallu nalunaarsuiffiat communalbestyrelsip ingerlatissavaa.</p> <p><i>Imm.</i> 2. Illuutinik inissianillu kiisalu teknikkut atortututinik il.il. nalunaarsuinermi pisiaqartumik ersarissuutitsinissaq pitsaassutsikkullu pitsaasuuutitsinissaq, piginnittullu nalunaarutigisaannik nakkutiginnissalluni communalbestyrelsip qulakkiigassaraa. Illuutit Inissiallu nalunaarsuiffianni paasissutissat pisutsinut piviusunut naapertuutinngitsut communalbestyrelsip malugiguniuk, paasissutissat nutarterneqarnissaat communalbestyrelsip isumagissavaa.</p> <p><i>Imm.</i> 3. Piginnittut nalunaarsuiffimmut nalunaarutaannik qanoq nakkutilliisoqarnissaan-nut Naalakkersuisut malittarisassanik aalajangersaasinnaapput.</p>
	<p><b>§ 17 c.</b> Pisortani oqartussaasoq alla imaluunniit ingerlatseqatigiiffik namminersortoq Illuutit Inissiallu nalunaarsuiffianni tamak-kiisumik ilaannakortumilluunniit pilersitsinisaanik, ingerlatsinissaanik ineriertortitsinisaanillu Naalakkersuisut piginnaatissinnaavaat. Oqartussaasoq imaluunniit ingerlatsivik nalunaarsuiffimmik qanoq pilersitsinissaanut, ingerlatsinissaanut ineriertortitsinissaanullu Naalakkersuisut malittarisassanik aalajangersaassapput.</p> <p><b>§ 17 d.</b> Illuutit Inissiallu nalunaarsuiffianni paasissutissat tulliuttut nalunaarsorneqassapput:</p> <p>1) sanaartukkat ataasiakkaat ilisarnaataat, u-kioq sanaartorfiusoq, inissisimaffia, angissuseq, ilusaa, atortorissaarutit, teknikkimut tunngasut, nukimmik pilersuutit atorneqarneralu kiisalu</p>

	<p>2) inissiat imaluunniit inuussutissarsiorfiit ataasiakkaat ilisarnaataat, ukioq sanaartorfiusoq, angissuseq, ilusaa, atortorissaarutit, nukimmik pilersuutit atorneqarneralu.</p> <p><i>Imm.</i> 2. sanaartukkanut tunngasunik, sanaartukanilu inissianut tunngasunik kiisaluteknikkikkut atortuutinut il.il. paasissutissanik allanik, pisortani oqartussat suliaannut pingaaaruteqarsinnaasunik imaluunniit inuiaqati-giinnut allatigut soqutiginaateqartunik nalunaarsuisoqarnissaannik Naalakkersuisut malittarisassanik aalajangersaasinnaapput.</p> <p><i>Imm.</i> 3. Nalunaarsuinissami paasissutissat naammattut eqqortullu qulakkeerumallugit Naalakkersuisut kommunalbestyrelsilu paasissutissaasivinni allani paasissutissanik, Illuutit Inissiallu nalunaarsuiffianni paasissutisanut ataqtigiissitsisinnaapput.</p> <p><b>§ 17 e.</b> Illuutit Inissiallu nalunaarsuiffiannik ingerlatsinermi paasissutissanik atugassanik pisortani oqartussat kiisalu illunik, sanaartukanik il.il. nalunaarsorneqarsimasunik pigin-nittuusut paasissutissanik paasissutissiisarnissaannut Naalakkersuisut malittarisassanik aalajangersaassapput.</p> <p><i>Imm.</i> 2. Naalagaaffeqatigiinnermi oqartusaasut isumaqtiginninniarfigereernerisigut, illuutit teknikkikkullu atortuutit il.il. Kalaallit Nunaanni naalagaaffeqatigiinnermi oqartusaasunit atorneqartartut pillugit paasissutissanik nalunaarsuisarnissamik Naalakkersuisut immikkut ittunik malittarisassiorsinnaapput.</p> <p><b>§ 17 f.</b> Pisortani oqartussat Illuutit inissiallu nalunaarsuiffiannik takunnissinnaanerinut kii-salu Namminersorlutik Oqartussat ataanni pisortat ingerlatsinerinut, kommunillu Illuutit inissiallu nalunaarsuiffiannik atuisussaatitaanerinut Naalakkersuisut malittarisassanik aalajangersaassapput.</p>
--	--

	<i>Imm. 2. Illuutit, inissiat teknikkikkullu atortuutit il.il. pillugit paasissutissanik nalunaarsorneqarsimasunik atuuttunik suliffeqarfiit namminersortut il.il. inuillu takunnissinnaanerinut, matumanii paasissutissanik killilim-mik takunnissinnaanermut, paasissutissanillu takunnissinnaanermut akiliutissat pillugit Naalakkersuisut malittarisassanik aalajanger-saassapput”</i>
	<p><b>4.</b> § 19-imi imm. 1-ip kingorna immikkoortut nutaatut ilanngunneqassaaq:</p> <p>” <i>Imm. 2. § 17 b malillugu nalunaarsuinissami paasissutissanik pissarsinissami sanaartuk-kap silataanik misissuinissaq uuttortaaniissarlu siunertalarugit kommunalbestyrelsi eqqartuussivimmi aalajangiinertaqanngitsumik i-sernissaminut piumasaqarsinnaavoq. Paasis-sutissat piginnittup paasissutissiissutigissallu-git pisussaaffigaanni paasissutissanik anner-tuumik nikingasoqarneranik patsisaassaqr-nermi, kommunalbestyrelsi illup iluanut alak-kaaniarluni uuttortaaniarlunilu eqqartuussi-vimmi aalajangiinertalimmik illumut isersin-naavoq.”</i></p> <p>Taassuma kingorna imm. 2, imm. 3-nngortin-neqassaaq.</p>
<i>Imm. 1. Inatsimmi tunngaviliineq naapertor-lugu illumummut isernissamut, aammalu § 19 naapertorlugu assersuinissamut inuerutsitsi-nissamullu politiit kommunalbestyrelsimum ikuutissapput.</i>	<b>5.</b> § 20-mi ”§ 19”, ”§ 17”-inngortinnejqassaaq.
<i>Imm. 2. § 5, imm 3 aamma § 11 naapertor-lugu iliuusissanut aallartinneqartussanut akit-suutissat pillugit Naalakkersuisut maleruagasiorsinnaapput.</i>	<b>6.</b> § 27-mi imm. 2-mi ”§ 5 imm. 3” ima allan-ngortinnejqassaaq: ”§ 6-imi imm. 3”.

	<b>§ 2</b>
	<p>Grønlands tekniske Organisationi pillugu      Inatsisartut peqqussutaanni nr. 8, 19. decem-      ber 1986-imeersumi, Inatsisartut peqqussu-      taanni nr. 18, 28. oktober 1993-imeersutigut,      Inatsisartut peqqussutaanni nr. 14, 6. novem-      ber 1997-imeersutigut, Inatsisartut peqqussu-      taanni nr. 5, 29. oktober 1999-imeersutigut,      Inatsisartut peqqussutaanni nr. 6, 21. maj      2002-meersutigut, Inatsisartut peqqussutaanni      nr. 10, 19. november 2007-imeersutigut kiisa-      lu Inatsisartut inatsisaanni nr. 21, 21. novem-      ber 2022-meersutigut allanngortinneqartumi,      tulliuttut allanngortinneqassapput:</p>
<p><b>§ 5.</b> Naalakkersuisut Kalaallit Nunaanni landsdommeri isumaqtiginiareerlugu Kalaallit Nunaanni illunik nalunaarsuinermut male-ruagassanik aalajangersaassapput, tassunga ilanngullugu illunik pisisup piginnittut nikinerinik nalunaarnissamik pisussaaffeqarneran-      nut maleruagassanik aamma aalajangersaallutik.</p> <p><i>Stk. 2.</i> Illunik nalunaarsuineq tamakkiisumik ilaannakortumilluunniit Naalakkersuisu-      nit kommunenut suliassiissutigineqarsinnaap-      put.</p> <p><i>Stk. 3.</i> Illunik nalunaarsuinermut tunngasut kommunenut suliassiissutiginerini Naalakker-      suisut maleruagassanik aalajangersaasinnaap-      put, taavalu kommunet illunik nalunaarsui-      nermut tassungalu atasumik piginnittut nikinerinik nalunaaruteqarnermut akiliummik pi-      umasaqarsinnaallutik.</p> <p><i>Stk. 4.</i> Maleruagassani aalajangersakkanut matumunnga naapertuuttumik atulersinneqar-      luni aalajangersarneqarsinnaavoq maleruagassanik unioqqutitsineq akiliisitsinermik pine-      qaatissiissutaasinnaasoq.</p>	<p><b>1.</b> § 5 atorunnaarsinneqassaaq.</p>

	<p style="text-align: center;"><b>§ 3</b></p> <p>Inatsisartut inatsisaat manna 2023-mi juulip aallaqqataani atuutilissaaq.</p> <p><i>Imm. 2. Kalaallit Nunaanni illunik inissianillu nalunaarsuisarneq pillugu GTO-mit kaajallaasitaq nr. 2.088 12. marts 1987-imeersoq, Sanaartorneq pillugu Inatsisartut inatsisaat naapertorlugu malittarisassatigut aalajangersarneqarluni allanngortinneqarnissaata imaluunniit atorunnaarsinneqarnissaata tungaanut atuutiinnassaaq.</i></p>
--	--

**Ilanngussaq 2****Tusarniaanermi akissutit pillugit allakkiaq**

Tusarniaanermi piffissaliussap qaangiunnerani akissutit katillugit arfineq-pingasut tiguneqarput. Tusarniaanermi piffissaliussap qaangiutereernerani akissut ataaseq aamma tiguneqarpoq.

Nunatta Eqqartuussisuuneqarfia kiisalu Isumaginninnermut, Suliffeqarnermut Nunamullu Namminermut Naalakkersuisoqarfik oqaaseqaatissaqaratik nalunaarutigaat.

Sulisitsisut kiisalu Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfik siunnersuut tapersorsorlugu, allatigulli oqaaseqaatissaqaratik nalunaarutigaat.

Kalaallit Airports kiisalu Tusassip siunnersuut tapersorsorlugu, annikitsutigulli allannguutisanik siunnersuutissaqarlutik nalunaarutigaat. Qeqqata Kommunia kiisalu Naalagaaffiup politiivi allannguutissatut siunnersuuteqarlutik oqaaseqaataat aamma tiguneqarput, Kommuneqarfik Sermersoorli siunnersummut qulaajaanerusumik arlalinnik apeqquteqarluni.

Oqaaseqaatit, apeqqutit, allannguutissatullu siunnersuutit tiguneqartut tulliuttumi saqqummiunneqarput. Tusariummut akissutit eqikkarlugit saqqummiunneqarput, taakkununngalu oqaaseqaatit akissutillu *uingasumik* allanneqarlutik.

Kalaallit Airports, Qeqqata Kommunia kiisalu Kommuneqarfik Sermersooq assigiinnik oqaaseqaateqarlutik, nukimmik atuinermut sunniuteqartussaalluni sanaartukkamik piusumik aserfallatsaaliuineremi piumasaqaataasoq eqqarsaatigalugu, sanaartornermut inatsisip § 2-ani nr. 5-imi aalajangersagaq ersarlunnerarpaat, tassungalu malittarisassanik ujartuillutik.

*Allannguisoqassannilaq. Sanaartornermut inatsimmi sinaakkutissatut aalajangersagaq nutaaq pineqarpoq, taamaalillunilu sanaartukkani piusuni aserfallatsaaliuineremi suliad il.il. inatsimmi ilaatinneqarlutik. Sanaartukkanik piusunik aserfallatsaaliuineremi il.il. nukimmik atuinermut sunniuteqartussanut piumasaqaatit illuliornermut malittarisassaniippuit. Inatsit manna tunngavigalugu illuliornermi malittarisassat nutaat saqqummiunneqassasut pilersaarutigineqarpoq, sanaartukkamilu nukimmik atuinermut sunniuteqartussaallutik sanaartukkanik piusunik aserfallatsaaliuinissanut, allanngortiterinissanut, allatigullu suliassanut malittarisassat illuliornermi malittarisassaniippuit. Sanaartornermut inatsimmi § 6 innersuussutigineqarpoq, taamaalilluni ilaatigut pisariaqanngitsumik nukinnik atuineq akerlilernissaa (nr. 6), ilaatigullu sanaartukkat atortulersuutaasalu ilaanni akunnaatsumik ingerlatsinissamut, aserfallatsaaliuinissamut nutarterinissamullu iluaqutaasinnaasut (nr. 9) eqqarsaatigalugit Naalakkersuisut aalajangersaasinnaammata.*

Nutarerinerni il.il. nukimmik atuinerup iliuuseqarfingineqarnissaanik piumasaqaataasoq kis-sartumik atuinermi annaasaqaataasartup naatsorsorneqarneratigut uppermarsarneqarnissaa, sa-naartornermut inatsisip § 2-ani nr. 5 sanatitsisumut, taassumalu siunnersortaanut kiisalu kom-munimi illuutinut oqartussaasumut piffissamik atuinangaatsiarsinnaanissaanik kinguneqartus-saasoq Tusassip ernumaatigalugu oqaatigaa. Tusass isumaqarpoq, pissutsit allat soorlu oqara-suaatinut teknikkikkut atortuutinut, tunngavissanik qulakkeerinermut, ikuallattoqaratarsinnaa-neranut qulakkeerinermut il.il. nukimmik atuinerit illuutimi annersaanni attuumassuteqarneru-sut, tamannalu tunuliaqataralugu siunnersuutigalugu inatsisissatut siunnersuut illunut najuga-qarfessianut, illunullu sulliviusunut kiisalu illuutinut tamanit atorneqartunut atuuttussanngor-tinneqassasoq.

*Kissartumik atuinermi annaasaqaataasartup naatsorsorneqarnissaa, nakkutigineqarnissaalu piffissamik atuinangaatsiarsinnaanissaanut ernumaatigineqartoq tunngavissaqanngitsutut a-kuerieqanngilaq. Kissartumik atuinermi annaasaqaataasartup naatsorsorneqarnissaanni programmit imaaliallaat naatsorsuisinnaasut atorneqarsinnaasut amerlapput, nukimmillu a-tuinermi sipaaruteqarnissamik suliniutaasup sunniutissaanik uppermarsaanissamik piumasa-qaataasoq pisarneq malillugu suleriaasissatut isigineqarluni. Illuliornermi malittarisassani 2006-imeersuni kapitali 1.2-mi imm. 1-imi g-mi allassimavoq, radiomut sakkortusaavinnullu illuaqqanut annerpaamik 30 m<sup>2</sup>-inik angissusilinnut aammalu 3,0 m-init portunerunngitsunut, kiisalu radiomut sakkortusaavinnullu illuaqqanut, illoqarfiiit nunaqarfiiillu killeqarfiiisa ava-taanni sananeqartunut atuutinngitsoq.*

Qeqqata Kommuniata kaammattuitigaa, BBR-imit iluanaarutissat nalunaarsuiffimmik inger-latsinermi aningaasartuutinut naapertuunnersut eqqarsaatigilluarneqassasoq.

*Allannguisoqassanngilaq. "Inuaqatigiit digitaliusut - Nuna tamakkerlugu digitaliseeriinermut periusissiaq 2018-2021" Namminersorlutik Oqartussat periusissiarisaanni tunngaviusumik paasissutissaasivimmut BBR ilaasoq, inatsisissatut siunnersummut nassuaatini nalingin-naasuni ilaatigut allassimavoq.*

Sanaartornermut inatsisip § 2-ani aalajangersakkat innersuussutigalugit Qeqqata Kommuniata oqaatigaa, BBR tamakkiisumik naammassineqarnissaanut ukiorpassuit ingerlassasut, taamaat-tumillu assersuutigalugu illuutit qassit pujoorfegarnersut imaluunniit kuuffissuarnut attaviler-simanersut takunissaanut assersuutigalugu kommuninit nalunaarsuiffik atorneqarsinnaassan-ningitsoq. Piffissap ingerlanerani kommuni nammineerluni B-normunut nammineerluni nalu-naarsuiffiminik suli nutarterisartussaammat, piffissaq nukiillu asuli atorneqannginnissaat pillugu BBR-ip torersarnissaanut, pilersinneqarnissaanullu piffissaliisoqassasoq Qeqqata Kommuniata kaammattuitigaa. BBR-ip atornissaanut qarasaasiatigut systeminik qaqugu ine-riartortitsisoqarlunilu atulersitsisoqassanersoq Kommuneqarfik Sermersuup apeqputigaa, tas-sungalu atatillugu nassuaatini nalinginnaasuni 3. Pisortanut aningaasaqarnikkut allaffissor-nikkullu kingunerisinnaasai innersuussutigalugit.

*Sanaartukkut qaqugukkut sanaartorneqarnerat apeqqutaatinnagu sanaartukkut BBR-imut nalunaarsorneqarnissaat ersarissarlugu, sanaartornermut inatsisip § 17 a-ni nr. 2-mi aalajangersagaq allanngortinneqassaaq. Taassuma saniatigut BBR-ip pilersinnejnarneranut atatillugu ataasiartumik suliassaqaaloqassasoq Naalakkersuisut ilimagigaat, BBR-imillu pilersitsinissaq il.il. pillugit inatsisissatut siunnersuummi maleruagassat naalakkersuisoqarfup susasaqartup, kommunillu suleqatigiinnerisigut suliarineqassasoq naatsorsuutigineqartoq, inatsisissatut siunnersuummut nassuaatini nalinginnaasuni ilaatigut allassimavoq.*

Sanaartornermut inatsimmi § 17 a-mut nassuaatit tunuliaqtaralugit Kommuneqarfik Sermersooq aperivoq, teknikkikkut illuutit mikisut tamarmik BBR-imi vejnormulerosneqassanersut, massakkummi illuutinik nalunaarsuisarnermi suleriaaseq naapertorlugu illuutit kisimik normulerosneqartarmata.

*Akissut: Sanaartornermut inatsimmi § 17 a-mut nassuaatit innersuussutigalugit, illuutit atavartut kisimik, taamaallunilu sanaartukkut sanaartornissamik akuersissuteqartariaqartut kiisalu teknikkikkut atortuutit nalunaarsuiffimmi allassimasut kisimik normulerosneqartassasut siunertaavoq. Najukkat pillugit inatsit naapertorlugu illuutit vejnormulesorneqartarput, najukkallu pillugit nalunaarsuiffimmut nalunaarsorneqartarlutik. Illuutit normui BBR-imi nalunaarsorneqassasut aalajangiisoqassagaluarpat, illuutit normui najukkat pillugit nalunaarsuiffimmit tiguneqassapput.*

Sanaartornermut inatsisip § 17 b-anut tunngatillugu Qeqqata Kommuniata oqaatigaa, kommunip BBR-imut ataavartumik nalunaarsuisarnissaanut ataatsimut tapiissutitigut kommunaniingaasatigut taarsiiffigineqassasoq, taassumalu saniatigut BBR-imik pilersitsinermi torersaasiaqarnermut atatillugu aningaasatigut taarsiiffigitissasoq naatsorsuutigalugu.

*Allannguisoqassanngilaq. Inatsisissatut siunnersuummut nassuaatit nalinginnaasut innersuussutigineqarput. Pisortanut aningaasaqarnikkut allaffissornikkullu kingunerisinnaasaani ilaatigut allassimavoq, BBR-imik pilersitsinermut atatillugu naatsorsuutigisamik qarasaasiatigut qitiusumik systeminut ikaarsaarnissaq, kommunit ingerlatsinerinut pisariillisaataassasoq naatsorsuutigineqartoq. Taassuma saniatigut BBR-imik pilersitsinermi (ataasiartumik suliassanut) kommuninut aningaasaqarnikkut kingunerisinnaasai, kommuninut ataatsimut taipiissutit pillugit Naalakkersuisut kommunillu isumaqatiginninniarnerini ilaatinneqassasut allassimavoq.*

Piffissami teknikkikkut ingerlatsivinnut pikkorissunik sulisunik pissarsiniartarnerup ajornarerani kommunit allaffissornikkut qaavatigut suliakkerneqarnerat Qeqqata Kommuniata ajornartorsiutitut isigaa.

*Allannguisoqassanngilaq. § 17 b-mi aalajangersakkamut nassuaatini ilaatigut allassimavoq, BBR-imik ingerlatsinermi kommuninut allaffissornikkut suliakkiissutigineqartut, massakkut aaqqiisummik nangitsinertut isigineqassasoq, taamaalillunilu kommunit sanaartornermut sulianik suliaqarnerminnut atatillugu kommunit ingerlatsivimmilu iluini illuutinik nalunaarsuisassasut.*

Sanaartornermut inatsimmi § 17 c-mut nassuaatit tunuliaqutaralugit Kommuneqarfik Sermersooq aperivoq, ”kommunit peqatigiillutik ingerlatseqatigiiffiutaat” § 17 c-mi aalajangersakkamut atasutut assersuutitut taaneqartillugu, ”ingerlatsiviit namminersortut” ”arlaatigut pisortat i-ngerlatseqatigiiffiutiginerai”.

*Akissut: Sanaartornermut inatsisip § 17 c-a innersuussutigalugu, BBR-imik ingerlatsinismik akisussaaffik Naalakkersuisut pisortani oqartussaasunut imaluunniit ingerlatseqatigiiffimmut namminersortumut ingerlateqqissinnaavaa. Aalajangersakkamut nassuaatini allassimavoq, ingerlatseqatigiiffik namminersortoq assersuutigalugu kommunit peqatigiillutik ingerlatseqatigiiffigisinnagaat. Taamaalilluni aalajangersakkap isumaa assersuummik ilallugu itisilerneqaannarpoq, ingerlatseqatigiiffiillu namminersortut tigusisinnaannginnissaat siunertarneqarani.*

Sanaartornermut inatsimmi § 17 d-mut tunngatillugu Qeqqata Kommuniata oqaatigaa, kommunip pisoq ataaseq marloriarluni nalunaarsortassanngimmagu, nunaminertat pillugit nalunaarsuiffimmut (NIN) aamma BBR-imut nalunaarsuiffimmut kommunit nalunaarsuisarnissaasa ataqtigiiinneqarnissaa pingaaruteqartutut isigalugu.

*Allannguisoqassanngilaq. Inatsisissatut siunnersuummut nassuaatini nalinginnaasuni ilaati-gut allassimavoq, tunngaviusumik paasissutissaasivik aqqutigalugu inuiaqatigiinnut qitiusumik tunngallutik paasissutissat, soorlu inuit (CPR), suliffeqarfiiit (CVR) najukkat, nunaminertat, sanaartukkat il.il. pillugit tunngaviusumik paasissutissanik nutartikkanik paasissutissarta-qarlutik digitalikkut tunngaviusumik paasissutissat ineriertortinnejarniartut, taamaattumillu marloqiusamik nalunaarsuisoqarsinnaassanngilaq. Tamatuma saniatigut nassuaatini allassimavoq, illuutit, inissiat/inuussutissarsiorfiit kiisalu allaffissornermi illuutit pillugit paasissutissanik/teknikkikkut paasissutissanik BBR paasissutissaqarnissaa taamaallaat siunertaasoq. Paasissutissat suut BBR-imut nalunaarsorneqarsinnaanissaannut assersuutit pillugit, sanaartornermut inatsisip § 17 d-anut nassuaatit innersuussutigineqarput.*

Kommuneqarfik Sermersooq isumaqarpoq, illuummik piginnittoq pillugu paasissutissaqarnissaanik BBR-ip siunertaqannginneranik nassuaatini nalinginnaasuni immikkoortoq 2.2-mi allassimasoq kiisalu sanaartornermut inatsisip § 17 d-ani aalajangersakkamut nassuaatini paasissutissat BBR-imut nalunaarsorneqartussatut assersuutitut taakkartorneqartut imminut akerliusut.

*Allannguisoqassanngilaq. Sanaartornermut inatsisip § 17 d-anut nassuaatit naapertorlugit piginnittuunermut tunngasut pillugit paasissutissat BBR-imut nalunaarsorneqartussatut piler-saarutigineqartutut assersuutigineqartut, piginnittuunermut tunngasoq pillugit paasissutis-saannaapput, imaappoq illu ataatsimik (imaluunniit arlalinnit) pigineqarnersoq imaluunniit inissiaatileqatigiiffiunersoq imaluunniit aktianik piginneqatigiiffiunersoq il.il. Illuummik piginnittoq pillugit paasissutissat nalunaarsorneqarnissaat pineqanngilaq.*

Tusassip oqaatigaa, inuiaqatigiinnut pingaarutillit attatiinnarneqarnissaannut arlalinnik sulifeqarfik suliaqartoq, suliffeqarfiullu ingerlataasa annersaat inuiaqatigiinnut pingaarutilittut isigineqartariaqartut. Tamanna tunualiaqtaralugu suliffeqarfiup illuutai, atortulersuutaalu BBR-imu suut nalunaarsorneqarnissaannut Tusass nangaassuteqarluni, tamannalu inatsimmi ersaris-sarneqassasoq kissaatigalugu.

*Allannguisoqassanngilaq. Teknikkikkut atortuutit, ingerlatsiviullu teknikkikkut ingerlatsinera pillugit BBR paasissutissaqassasoq siunertaanngilaq. Paasissutissat BBR-imut nalunaarsorneqartussat, sanaartornermut inatsisip § 17 d-ani allassimapput. Paasissutissat suut nalunaarsorneqassanersut, aalajangersakkanut nassuaatini tamanna assersuuteqarfigalugu itisilerneqarpoq. Teknikkikkut atortuutit eqqarsaatigalugit illuummi kissartumik, imermillu piler-suutit kiisalu kuuffit, imaappoq atortuutit illuummut atasut kisimik pineqarput. Paasissutissanik allanik nalunaarsuinissamut Naalakkersuisut aalajangersakkanik aalajangersaanissaannut, § 17 d-mi imm. 2-mi aalajangersakkap Naalakkersuisut piginnaatippai, paasissutissalli allat taakkua inatsit naapertorlugu pisortani oqartussat suliaannut attuumassuteqassasut imaluunniit paasissutissat inuiaqatigiit soqutigisaannut attuumassuteqassasut piumasaqaataavog.*

Kalaallit Airports, Tusass aamma Naalagaaffimmi politiit assigiinnik oqaaseqaateqarlutik oqaatigaat, isumannaallisaaneq patsisaalluni BBR-imut ingerlateqqinnejqarsinnaangitsunik imaluunniit ilanngunneqarsinnaanngitsunik paasissutissaqarsinnaasoq. Assersuutigalugu illuutinut illersornissaqarfimmuit, politiinut, nalunaarasuartaateqarnermi attaveqaatinut, mittarfinnuit imaluunniit sulianut inuiaqatigiinnut pingaaruteqartunut attuumassuteqartunut paasissutisaasinnaapput. Tusarniaaffigineqartut isumaqarput, BBR-imut paasissutissanik nalunaarsu-sarnermi pisortani illersorneqartariaqartut pillugit aalajangersagaliortoqarnissaa pisariaqartoq.

*Inuiaqatigiinni illersorneqartariaqartut, qajassuunneqartariaqarnerallu pissutissaqartippagu Naalakkersuisut immikkut ittunnik aalajangersaasinnaanerat pillugu, sanaartornermut inatsisip § 17 e-ani immikkoortumik nutaamik ilanngussisoqassaaq. Nassuaatini nalinginnaasuni (immikkoortoq 7: Kingunerisinnaasai allat annertuut) kiisalu sanaartornermut inatsimmi § 17 f-iani nassuaatini aamma allassimavoq, Namminersorlutik Oqartussat kommunillu ataanni pisortani ingerlatsisut kiisalu suliffeqarfit namminersortut inuillu BBR-imu paasissutissanik takunnissinnaanerinut Naalakkersuisut malittarisassanik aalajangersaanerminni pissutsit taakku eqqarsaatigisinnaagaat.*

Sanaartornermut inatsisip § 17 f-iani imm. 2 innersuussutigalugu titartakkat, atuinissamut a-kuersissutip, nunaminertamik atugassiissutip il.il. assilinerinik tunniussinermanni kommunit akiligassiisinnaanerinut aalajangersagaq periarfissiinersoq Kommuneqarfik aperivoq.

*Akissut: Sanaartornermut inatsisip § 17 f-iani imm. 2-mi aalajangersakkanut nassuaatit innersuussutigalugit, BBR-imi paasissutissanik tamat takunnissinnaanerinut Naalakkersuisut malittarisassanik aalajangersaasinnaapput, soorluttaaq taamatut takunnissinnaanermut akili-uteqartitsisoqarsinnaasoq aalajangersakkami allassimasoq. Malittarisassat taamak ittut suli aalajangersarneqarsimatinnagit, suliffeqarfiiit namminersortut inuillu BBR-imi paasissutissanik pissarsinerini kommunit suliaminnut sutigut akiliuteqartitsisinnaassanersut oqaatigiuminaappoq.*

Taamaassappat kommunit inatsisitigut qulakkeerneqartumik sanaartukkani, sanaartukkallu eqqaanni alakkaasinnaanerat, uuttortaasinnaanerallu, paasissutissat isumannaatsuutinneqarnisaasa attatiinnarneqarnissaannut, nipangiusimasussaatitaanerinullu suliffeqarfiiit pisussaaffii eqqornagid ingerlanneqarsinnaassasoq pillugu Tusass nangaassuteqarpoq. Kommuneqarfik isumaqarpoq, eqqartuussivimmi aalajangiineq qaqugukkut piumasaqaataanersoq imaluunniit piumasaqaataannginnersoq pillugu paatsuunganarsinnaasoq.

*Allannguisoqassannigilaq. BBR-imi paasissutissat misissorniarlugit eqqartuussivimmi aalajangiinertaqanngitsumik kommuni sanaartukkamut isersinnaanera pillugu sanaartornermut inatsisip § 19-iani imm. 2-mi ersarissaasoqarnissaanik siunnersuutigineqartoq, sanaartornermut tunngasunik suliaqarnermut atatillugu eqqartuussivimmi aalajangiinertaqanngitsumik kommunip sanaartukkamik nakkutiliinissaminut nalinginnaasumik pisinnaatitaaneranit annertuumik allaanerussuteqanngitsoq nalilerneqarpoq, tak. sanaartornermut inatsisip § 19-iani imm. 1. Innuttaasup paasissutissiinissaminik pisussaaffigisaannik kommuni paasissutisanik annertuumik nikingsoqarneranik pasitsaassaqartilluni kommuni illup iluani nakkutiliinissaani, uuttortaanissaanilu eqqartuussivimmi aalajangiinertaqassasoq piumasaqaataasoq ilanngullugu erseqqissaatigineqarpoq.*

Najukkat pillugit inatsisip § 3-ata atorunnaarsinnejarnissaanik siunnersummut patsisaasoq Kommuneqarfik Sermersuup apeqqutigaa.

*Akissut: Inatsisissatut siunnersuummi § 2-mut nassuaatini (tusarniaanermi atortuni) allassi-mavoq, illuutinik normulersuisarneq – matumani nuna tamakkerlugu illuutinut inissianullu nalunaarsuiffimmik pilersitsineq ilanngullugu – inatsisissatut siunnersuutip akuersissutigineqarneratigut najukkat pillugit inatsimmit sanaartornermut inatsimmut nuunneqassasoq. Najukkat pillugit inatsisip allanngornissaanik siunnersuut atorunnaarsinnejarnissaanik kingorna aalajangerneqarpoq.*